

Na osnovu člana IV 4.a) Ustava Bosne i Hercegovine, Parlamentarna skupština Bosne i Hercegovine je na \_\_. sjednici Predstavničkog doma, održanoj \_\_. \_\_. 2017. godine i na \_\_. sjednici Doma naroda, održanoj \_\_. \_\_. 2017. godine, donijela

**ZAKON**  
**O SPREČAVANJU SUKOPA INTERESA U INSTITUCIJAMA**  
**BOSNE I HERCEGOVINE**

**POGLAVLJE I. Opšte odredbe**

**Član 1.**

**(Predmet)**

(1) Zakonom o sprečavanju sukoba interesa (u daljem tekstu: Zakon) uređuju se posebne obaveze nosilaca javnih funkcija na nivou Bosne i Hercegovine s ciljem sprečavanja sukoba interesa u obavljanju javne funkcije, obaveza podnošenja i sadržaj izvještaja o finansijskom stanju i imovini nosilaca javne funkcije, nadležnost za provođenje Zakona, osnivanje i postupak Komisije za odlučivanje o sukobu interesa (u daljem tekstu: Komisija) u provođenju Zakona, kao i druga pitanja od značaja za provođenje ovog zakona.

(2) Sukob interesa postoji u situacijama u kojima nosioci javnih funkcija imaju privatni interes koji utiče, može uticati ili izgleda da može uticati na zakonitost, otvorenost, objektivnost i nepristrasnost u obavljanju javne funkcije.

**Član 2.**

**(Upotreba muškog ili ženskog roda)**

Izrazi koji su, radi preglednosti, dati u jednom gramatičkom roku, bez diskriminacije se odnose i na muškarce i na žene.

**Član 3.**

**(Definicije)**

U smislu ovog zakona:

a) „**nosilac javne funkcije**“ je izabrano ili imenovano lice u instituciji Bosne i Hercegovine, tijelu, agenciji i ustanovi koje osniva Bosna i Hercegovina, korporaciji ili drugom pravnom licu koje vrši javna ovlaštenja, odnosno djelatnosti od javnog interesa, kao i lice na čiji izbor ili imenovanje saglasnost daje ministarstvo u Vijeću ministara, Vijeće ministara, Predsjedništvo BiH, Parlamentarna skupština BiH, ukoliko drugim zakonom nije drugačije određeno;

b) „**ovlašteno lice**“ je lice koje je osnivačkim aktom ili drugim aktima preduzeća ovlašteno da predstavlja i zastupa preduzeće, kao i poduzetnik, odnosno fizičko lice koje samostalno na tržištu obavlja djelatnosti radi sticanja dobiti;

c) „**bliski srodnik**“ je bračni drug, vanbračni drug, dijete, majka, otac, usvojitelj i usvojenik nosioca javne funkcije;

- d) „povezano lice“ je bliski srodnik, srodnik u pravoj liniji, srodnik u pobočnoj liniji do trećeg stepena, srodnik po tazbini do drugog stepena, dijete bračnog druga, ili bilo koje pravno ili fizičko lice koje je sa nosiocem javne funkcije u ličnoj, političkoj, ekonomskoj ili drugoj vezi koja bi mogla uticati na objektivnost u radu nosioca javne funkcije;
- e) „ulaganje kapitala“ je ulaganje novca, stvari i prava u vlasničku strukturu preduzeća;
- f) „finansijski interes“ je:
1. svaki interes kojim se nosiocu javne funkcije omogućava da primi novac u vrijednosti većoj od 1.000 KM godišnje;
  2. svaki vlasnički interes koji ima nosilac javne funkcije, koji odgovara vrijednosti od najmanje 10.000 KM u preduzeću, društvu sa neograničenom odgovornošću, komanditnom društvu, dioničarskom društvu ili društvu sa ograničenom odgovornošću;
- g) „privatni interes“ je bilo kakva ostvarena ili moguća korist, pogodnost ili stavljanje u izgled koristi i pogodnosti za nosioca javne funkcije ili povezano lice;
- h) „poklon“ je novac, stvar, pravo i usluga izvršena bez odgovarajuće naknade i svaka druga korist koja je data nosiocu funkcije ili povezanom licu u vezi s vršenjem javne funkcije;
- i) „privatno preduzeće“ je svako zakonom utvrđeno privredno društvo koje nije javno preduzeće definirano u daljem tekstu;
- j) „javna funkcija“ je posao izabranog ili imenovanog lica u instituciji Bosne i Hercegovine, tijelu, agenciji i ustanovi koje osniva Bosna i Hercegovina, korporaciji, ili drugom pravnom licu koje vrši javna ovlaštenja, odnosno djelatnosti od javnog interesa, kao i lica na čiji izbor ili imenovanje saglasnost daje ministarstvo u Vijeću ministara, Vijeće ministara, Predsjedništvo BiH, Parlamentarna skupština BiH;
- k) „vlada“ je Vijeće ministara BiH, Vlada Federacije BiH, Vlada Republike Srpske, Vlada Brčko Distrikta BiH, vlada kantona, gradska skupština, općinsko vijeće, gradonačelnik i načelnik općine koji je ovlašten da raspolaže novčanim sredstvima, imovinom i pravima;
- l) „lična usluga“ je svako djelovanje kojim se jedna strana obavezuje da obavi određeni posao, a da druga strana za obavljanje tog posla pruži materijalnu ili nematerijalnu korist ili naknadu, koja ne proizilazi iz radnog odnosa;
- m) „institucija Bosne i Hercegovine“ je svaka institucija Bosne i Hercegovine osnovana Ustavom i zakonom Bosne i Hercegovine;
- n) „javno preduzeće“ je preduzeće osnovano u skladu sa Zakonom o javnim preduzećima Republike Srpske, Zakonom o javnim preduzećima u Federaciji Bosne i Hercegovine i Zakonom o javnim preduzećima Brčko Distrikta BiH;
- o) „javna ustanova“ je javna ustanova koju je osnovao entitet, kanton, Brčko Distrikt, grad ili opština.

## **Član 4.**

### **(Principi djelovanja nosioca javne funkcije)**

- (1) Nosioc javne funkcije u obavljanju javne funkcije postupaju zakonito, efikasno, nepristrasno i časno i pridržavaju se principa odgovornosti, poštenja, savjesnosti, otvorenosti i vjerodostojnosti.
- (2) Nosioc javne funkcije lično je odgovoran za svoje djelovanje u obavljanju javne funkcije na koje je imenovan, odnosno izabran, i politički je odgovoran tijelu ili građanima koji su ga imenovali ili izabrali.
- (3) Nosioc javne funkcije ponaša se savjesno i odgovorno, ne ugrožava povjerenje i pouzdanje građana, poštuje zakonske i druge propise kojima se određuju prava, obaveze i odgovornosti u obavljanju javne funkcije.
- (4) U obavljanju javne funkcije nosioc javne funkcije pridržava se etike poziva i funkcije koju obavlja.
- (5) U obavljanju javne funkcije nosioc javne funkcije ne smije svoj privatni interes i interes povezanih lica stavljati iznad javnog interesa.
- (6) Nosioc javne funkcije ne smiju koristiti javnu funkciju za ličnu dobit i dobit lica koje je s njim povezano.
- (7) Nosioc javne funkcije, kao javna ličnost, djeluje u interesu građana.
- (8) U obavljanju funkcije, nosioc javne funkcije obavezan je imovinu, sredstva za rad i finansijska sredstva koja su mu povjerena koristiti na efikasan način i isključivo u svrhu za koju su namjenjena.
- (9) Nosioc javne funkcije, za vrijeme obavljanja javne funkcije, prima platu i naknade za funkciju koju obavljaju u skladu sa zakonskim propisima o platama i naknadama zaposlenih u institucijama Bosne i Hercegovine i drugim propisima.
- (10) U slučaju dvojbe je li neko ponašanje u skladu s principima Zakona, nosioc javne funkcije može zatražiti mišljenje Komisije.

## **POGLAVLJE II. Nespojivosti**

### **Član 5.**

#### **(Obavljanje drugih funkcija i nespojivosti)**

- (1) Nosioc javne funkcije obavlja samo jednu javnu funkciju, osim ako je zakonom i drugim propisom drugačije propisano.
- (2) Odredba iz stava (1) ovog člana odnosi se na zabranu obavljanja druge javne funkcije na svim nivoima vlasti u Bosni i Hercegovini. Javna funkcija, osim funkcije definisane Zakonom, definisana je i zakonima koji regulišu istu materiju na drugim nivoima vlasti.
- (3) Za vrijeme vršenja javne funkcije, koja podrazumijeva rad sa punim radnim vremenom, nosioc javne funkcije ne može obavljati druge poslove.
- (4) Izuzetno od odredbi stava (3) ovog člana, nosioc javne funkcije može se baviti naučnim, nastavnim, kulturnim, umjetničkim i sportskim radom i sticati prihode od

autorskih, patentnih i sličnih prava, intelektualne i industrijske svojine, ukoliko bavljenje ovim djelatnostima ne dovodi do sukoba interesa.

(5) Članstvo u upravnom odboru, nadzornom odboru, skupštini, upravi ili menadžmentu, ili u svojstvu ovlaštene osobe u javnom preduzeću ili javnoj ustanovi nespojivo je sa vršenjem javne funkcije.

(6) Članstvo u stalnim ili povremenim radnim tijelima koje formira organ vlasti u kojem nosilac funkcije obavlja funkciju ne smatra se vršenjem dvije ili više javnih funkcija.

(7) Angažman u privatnom preduzeću, u uslovima u kojima se stvara sukob interesa, nespojiv je sa vršenjem javne funkcije.

(8) Nosilac javne funkcije podnosi ostavku na svaku od nespojivih i nedozvoljenih funkcija i poslova najkasnije u roku od 15 dana nakon preuzimanja javne funkcije.

(9) Ukoliko Komisija utvrdi da nosilac javne funkcije obavlja druge funkcije i aktivnosti suprotno odredbama ovog člana, naložiće nosiocu javne funkcije da prestane sa obavljanjem drugih funkcija i aktivnosti u roku od 30 dana.

#### **Član 6.**

##### **(Nespojivosti u odnosu na privatna preduzeća)**

(1) Nosilac javne funkcije, za vrijeme obavljanja javne funkcije, ne može biti član skupštine, nadzornog odbora, uprave ili menadžmenta, biti u svojstvu ovlaštenog lica, niti imati bilo kakav finansijski interes, što uključuje i pružanje ličnih usluga, u bilo kojem privatnom preduzeću kojem je vlada davala bilo kakve podsticaje i olakšice, uključujući i kreditna sredstva, u iznosu većem od 10.000 KM na godišnjem nivou.

(2) Nosilac javne funkcije ne može biti član skupštine, nadzornog odbora, uprave ili menadžmenta, biti u svojstvu ovlaštene osobe ili imati finansijski interes, što uključuje i pružanje ličnih usluga, u bilo kojem privatnom preduzeću koje sklapa ugovore, ili na drugi način posluje, sa institucijama i organima koji se finansiraju iz budžeta na bilo kojem nivou. Ova odredba primjenjuje se na privatna preduzeća koja su sklopila ugovor ili posluju sa institucijama koje se finansiraju iz budžeta u iznosu većem od 10.000 KM na godišnjem nivou.

#### **Član 7.**

##### **(Zabrana djelovanja u slučaju sukoba interesa)**

(1) Nosilac javne funkcije ne može učestvovati u procesu odlučivanja, niti glasati po bilo kojem pitanju koje se direktno tiče privatnog preduzeća u kojem taj nosilac javne funkcije ili povezano lice ima finansijski interes, te bilo kojih drugih pitanja koja se direktno tiču povezanog lica. Nosilac javne funkcije koji se nađe u takvoj situaciji izuzet će se iz procesa odlučivanja i od glasanja, te na otvorenoj sjednici objasniti razloge izuzeća.

(2) Nosilac javne funkcije neće poduzimati nikakve službene radnje koje bi mogle direktno uticati na privatno preduzeće u kojem nosilac javne funkcije ili povezano lice ima finansijski interes, kao ni radnje kojima nosilac funkcije i povezano lice direktno ostvaruje finansijski

interes, što uključuje i zaposlenje, imenovanje ili postavljenje povezanog lica. Nosilac javne funkcije će u takvim situacijama proslijediti donošenje odluke o poduzimanju radnje drugom nadležnom tijelu i pismeno navesti razloge za takvo prosljeđivanje.

#### **Član 8.**

##### **(Korištenje funkcije i jasnih resursa za promociju političkog subjekta)**

Nosilac javne funkcije ne može koristiti javne resurse kojima ima pristup u svojstvu obnašanja funkcije, za promociju političkih stranaka, odnosno političkih subjekata i u lične svrhe.

#### **Član 9.**

##### **(Obavljanje drugih poslova nosilaca javnih funkcija)**

(1) Za vrijeme vršenja javne funkcije nosilac javne funkcije ne smije obavljati dužnost predsjednika, direktora, ili člana organa upravljanja i nadzornog organa u fondaciji i udruženju osnovanom u skladu sa zakonima o udruženjima i fondacijama, a koji se finansiraju iz budžeta bilo kojeg nivoa vlasti, u iznosu od 10.000 KM godišnje, odnosno u iznosu većem od 50.000 KM godišnje u fondaciji i udruženju iz oblasti kulture i sporta.

(2) Nosilac javne funkcije koji je član, predsjednik, direktor, ili član organa upravljanja i nadzornog organa udruženja ili fondacije ne može primati naknadu ili poklone po osnovu članstva u udruženju, izuzev naknade putnih i drugih troškova.

#### **Član 10.**

##### **(Angažman bliskih srodnika)**

Do sukoba interesa nosioca javne funkcije dovodi i angažman bliskog srodnika u situacijama definiranim članom 5. stav (5) ovog Zakona, te članovima 6. i 9. ovog Zakona.

#### **Član 11.**

##### **(Ograničenja nakon prestanka funkcije)**

- (1) U periodu od 12 mjeseci po prestanku javne funkcije nosilac javne funkcije ne može:
- a) pred organom u kojem je vršio javnu funkciju nastupati kao predstavnik ili punomoćnik pravnog lica, preduzetnika ili međunarodne ili druge organizacije koja sa tim javnim organom ima ili uspostavlja ugovorni, odnosno poslovni odnos;
  - b) zasnovati radni odnos ili uspostaviti poslovnu saradnju sa pravnim licem, preduzetnikom ili međunarodnom ili drugom organizacijom koji ostvaruju korist na osnovu odluka organa u kojem je nosilac javne funkcije obavljao funkciju;
  - c) zastupati pravno ili fizičko lice pred organom u kojem je vršio javnu funkciju u predmetu u kojem je kao javni funkcioner učestvovao u donošenju odluke;
  - d) obavljati poslove upravljanja ili revizije u pravnom licu u kojem su, najmanje jednu godinu prije prestanka javne funkcije, njegove dužnosti bile povezane sa supervizorskim ili kontrolnim poslovima;

- e) stupiti u ugovorni odnos ili drugi oblik poslovne saradnje sa organom u kojem je obavljao funkciju;
  - f) upotrijebiti povlaštene informacije i obavještenja do kojih je došao u vršenju javne funkcije radi sticanja koristi za sebe ili drugog ili radi nanošenja štete drugom, osim ako su ta znanja i obavještenja dostupna javnosti.
- (2) Odredbe iz stava (1) ovog člana ne odnose se na sticanje prihoda i naknada po osnovu sudjelovanja u međunarodnim projektima koje finansira Evropska unija, strana država, strana i međunarodna organizacija i udruženje.

## **Član 12.**

### **(Zabranjene aktivnosti)**

Osim ako je to izričito dozvoljeno odredbama ovoga Zakona, nosiocu javne funkcije zabranjeno je:

- a) primiti ili zahtijevati poklon ili drugu korist ili obećanje poklona ili druge koristi radi obavljanja javne funkcije;
- b) primiti dodatnu naknadu za obavljanje poslova u sklopu vršenja javne funkcije;
- c) tražiti, prihvatiti ili primiti poklon ili uslugu radi glasanja o bilo kojem pitanju ili uticati na odluku nekog tijela ili osobe;
- d) obećavati zaposlenje ili neko drugo pravo u zamjenu za poklon ili obećanje poklona;
- e) privilegovati osobe radi stranačkog ili drugog opredjeljenja ili radi porijekla, ličnih ili porodičnih veza;
- f) odbiti uvid u svoje finansijsko poslovanje;
- g) uticati na dobijanje poslova ili narudžbi države u cilju sticanja materijalne ili nematerijalne koristi za sebe ili za drugoga;
- h) koristiti povlaštene informacije o radu državnih tijela radi lične koristi ili koristi interesno povezanih lica i
- i) koristiti svoj položaj kako bi uticao na zakonodavne, izvršne ili sudske vlasti te tako postigao ličnu korist ili korist interesno povezanog lica, neku povlasticu ili pravo, sklopio pravni posao ili na drugi način interesno pogodio sebi ili drugom interesno povezanom licu.

## **Član 13.**

### **(Primanje poklona)**

- (1) Poklon se definira u skladu s članom 3. tačka h) Zakona. Vrijednost poklona je njegova tržišna vrijednost.
- (2) Poklon u vrijednosti do 200,00 KM nosioci javne funkcije mogu zadržati i ne trebaju ga prijaviti.
- (3) Poklonom, u smislu stava (2) ovoga člana, smatra se i više poklona učinjenih od istog lica u toku jedne godine. Ukoliko nosilac javne funkcije dobije više poklona od istog lica u toku jedne godine, njihova ukupna vrijednost ne smije preći iznos od 200,00 KM.

(4) Poklone iznad vrijednosti od 200,00 KM nosilac javne funkcije ne smije zadržati i obavezan ih je prijaviti i predati instituciji vlasti koja ga je izabrala ili imenovala i u čije ime obavlja povjerenu javnu funkciju. Informaciju o predatom poklonu institucije BiH dužne su dostaviti Komisiji za odlučivanje o sukobu interesa u roku od 15 dana od dana prijema poklona.

(5) Nosilac javne funkcije ne smije primiti novac, ček ili drugi vrijednosni papir bez obzira na iznos.

(6) U slučaju sumnje o vrijednosti poklona nosilac javne funkcije dužan je obratiti se upitom Komisiji.

(7) Primanje poklona, u skladu s odredbama ovog Zakona, odnosi se i na lice koje prima poklon u korist nosioca javne funkcije.

(8) Komisija za odlučivanje o sukobu interesa će u roku od 30 dana od dana stupanja na snagu ovog Zakona posebnim aktom propisati postupak, način evidentiranja, predaje i čuvanja primljenih poklona u institucijama BiH.

(9) Komisija za odlučivanje o sukobu interesa dužna je uspostaviti centralni registar poklona koje je nosilac javne funkcije primio u toku obavljanja javne funkcije.

### **POGLAVLJE III. Izvještaji o finansijskom stanju i imovini**

#### **Član 14.**

##### **(Podnošenje izvještaja o finansijskom stanju i imovini nosilaca javne funkcije)**

(1) Nosilac javne funkcije dužan je, u roku od 30 dana od dana stupanja na javnu funkciju, podnijeti Komisiji za odlučivanje o sukobu interesa Izvještaj o finansijskom stanju i imovini (u daljem tekstu: Izvještaj), za sebe i bliske srodnike prema stanju na dan izbora, odnosno imenovanja.

(2) Izvještaj sadrži lične podatke nosioca funkcije i njegovih bliskih srodnika, uključujući JMB, podatke o funkciji koju nosilac javne funkcije obavlja, te podatke o:

- a) pravu svojine na nepokretnim stvarima u zemlji i inostranstvu;
- b) pravu svojine na pokretnim stvarima koje podliježu registraciji kod nadležnih organa u zemlji i inostranstvu;
- c) pravu svojine nad drugim pokretnim stvarima vrijednosti veće od 2.000 KM (dragocjenosti, zbirke, umjetnički predmeti i sl.);
- d) depozitima u bankama i drugim finansijskim organizacijama, u zemlji i inostranstvu;
- e) akcijama i udjelima u pravnom licu i drugim hartijama od vrijednosti;
- f) pravima po osnovu autorskih, patentnih i sličnih prava intelektualne svojine;
- g) dugovima (glavnica, kamata i rok otplate) i potraživanjima;
- h) izvoru i visini neto prihoda od vršenja javne funkcije;
- i) pravu korištenja stana za službene potrebe;
- j) izvoru i visini drugih neto prihoda;
- k) drugim poslovima i djelatnostima koje obavlja u skladu sa zakonom;

- l) članstvu u organima udruženja;
  - m) druge podatke i dokaze koje funkcioner smatra bitnim za primjenu ovog zakona.
- (3) Nosioc funkcije dužan je u Izvještaju navesti tačne i potpune podatke.
- (4) Nosioc javne funkcije u toku vršenja funkcije podnosi:
- a) ažuriran Izvještaj, jednom godišnje, do 31. marta tekuće godine za prethodnu godinu;
  - b) dopunu Izvještaja za svaku promjenu iz stava (2) tč. a), b), c), f), i), k), l), i m) ovog člana, kao i u slučaju promjena iz Izvještaja koje se odnose na uvećanje imovine po bilo kom osnovu u iznosu većem od 10.000 KM, u roku od 30 dana od dana nastanka promjene;
  - c) ažuriran Izvještaj na zahtjev Komisije u slučaju pokretanja postupka za utvrđivanje povrede odredaba ovog Zakona, u roku od 30 dana od dana prijema zahtjeva.
- (5) Nosioci javnih funkcija dužni su podnositi Izvještaje dvije godine nakon prestanka obavljanja funkcije, i to jednom godišnje, do 31. marta tekuće godine za prethodnu godinu.
- (6) U roku od 30 dana od dana prestanka funkcije, nosilac javne funkcije o tome obavještava Komisiju za odlučivanje o sukobu interesa i podnosi Izvještaj.
- (7) Komisija će, u roku od 60 dana od dana stupanja na snagu ovog Zakona, propisati obrasce i bližu sadržinu Izvještaja, te uspostaviti Jedinstveni registar imovine nosilaca javnih funkcija.
- (8) Komisija je dužna evidentirati Izvještaje u Jedinstveni registar imovine nosilaca javnih funkcija.
- (9) Jedinstveni registar imovine nosilaca javnih funkcija dostupan je na službenoj web stranici Komisije za odlučivanje o sukobu interesa. Lični podaci nosilaca javnih funkcija i njihovih bliskih srodnika štite se u skladu sa zakonskim propisima, s ciljem sprečavanja zloupotreba.

## **Član 15.**

### **(Provjera podataka iz Izvještaja)**

- (1) Komisija vrši provjeru tačnosti i potpunosti podataka iz Izvještaja upoređivanjem tih podataka sa prikupljenim podacima o imovini i prihodima nosioca javne funkcije od organa i pravnih lica koji raspolažu tim podacima, na svim nivoima vlasti u Bosni i Hercegovini. Postupak prikupljanja podataka i njihove provjere, kao i organe od kojih se pribavljaju podaci, Komisija detaljno propisuje Pravilnikom o prikupljanju i postupku provjere podataka iz izvještaja o finansijskom stanju i imovini nosilaca javnih funkcija.
- (2) Organi i pravna lica iz stava (1) ovog člana dužni su da, u roku i na način koji odredi Komisija, dostave tražene podatke, odnosno stave na uvid traženu dokumentaciju u skladu sa Zakonom.
- (3) Ako se u postupku provjere utvrdi da ne postoji saglasnost između podataka navedenih u Izvještaju i stvarnog stanja ili da ne postoji saglasnost između uvećane vrijednosti imovine nosioca javne funkcije i njegovih prijavljenih prihoda, nosilac funkcije je dužan da se, na



zahtjev Komisije, očituje u pisanoj formi u roku od 30 dana, te dostavi detaljne podatke o osnovima sticanja imovine i prihoda.

(4) Ako nosilac javne funkcije:

- a) ne dostavi Komisiji očitovanje u pisanoj formi u propisanom roku od 30 dana ili
- b) ne priloži odgovarajuće dokaze potrebne za usklađivanje podataka navedenih u Izvještaju sa podacima koji su utvrđeni postupkom provjere, Komisija će pokrenuti postupak protiv nosioca funkcije, zbog kršenja odredbi iz člana 14. ovog Zakona, te će o tome obavijestiti organ u kome nosilac funkcije vrši javnu funkciju i druge nadležne organe.

(5) Postupak provjere podataka iz Izvještaja nije dostupan za javnost do trenutka kada Komisija donese konačnu odluku.

## **Član 16.**

### **(Provođenje Zakona i osnivanje Komisije za odlučivanje o sukobu interesa)**

- (1) Za provođenje ovog Zakona osniva se Komisija.
- (2) Komisija je stalno, nezavisno i samostalno tijelo uspostavljeno od strane Parlamentarne skupštine Bosne i Hercegovine, sa sjedištem u Parlamentarnoj skupštini BiH u Sarajevu, koje obavlja poslove iz svog djelokruga rada i nadležnosti određenih ovim zakonom.
- (3) Za člana Komisije ne može biti imenovano lice koje je nosilac javne funkcije.
- (4) Zabranjen je svaki oblik uticaja na rad Komisije koji bi mogao ugroziti njenu samostalnost i nezavisnost u donošenju odluka.
- (5) Sredstva za rad Komisije osiguravaju se u Budžetu Parlamentarne skupštine Bosne i Hercegovine.

## **Član 17.**

### **(Nadležnosti Komisije)**

- (1) Komisija djeluje na osnovu Zakona kako bi osigurala političku odgovornost i vjerodostojnost nosilaca javne funkcije u cilju zaštite integriteta funkcije.
- (2) Komisija nepristrasno, odgovorno i objektivno provodi postupak za utvrđivanje postojanja sukoba interesa u konkretnom djelovanju ili situaciji i izriče sankcije, u skladu sa odredbama ovog Zakona.
- (3) Komisija usvaja Poslovnik o radu.
- (4) Komisija sačinjava, ažurira i provjerava Registar nosilaca javnih funkcija i njihove imovine (u daljem tekstu: Registar), donosi upute, propise i obrasce za podnošenje Izvještaja.
- (5) Komisija donosi Pravilnik o načinu vođenja Registra, kojim se propisuju pravila o vođenju registra, obrasci, kao i druga pitanja neophodna za funkcioniranje Registra.
- (6) Komisija donosi Pravilnik o načinu vođenja postupka, dostavljanju odluke te sastavljanju izvještaja.
- (7) Komisija donosi odluke o tome da li neko djelovanje ili situacija predstavljaju kršenje odredbi ovoga Zakona i izriče sankcije, u skladu sa odredbama ovog zakona.

(8) U cilju primjene odredbi ovog Zakona, Komisija daje mišljenja i donosi uputstva na upit ili po službenoj dužnosti. Rok za dostavljanje mišljenja ili uputstva na upit nosioca javnih funkcija ili drugih zainteresovanih lica je 15 dana.

(9) Komisija provodi obuke, prezentacije i informiše nosioce javnih funkcija o njihovim pravima i obavezama značajnim za sukob interesa i podnošenje izvještaja o finansijskom stanju i imovini, te na druge načine promoviše vrijednosti i principe ovog Zakona.

#### **Član 18.**

##### **(Postupak izbora članova Komisije)**

- (1) Komisiju čine predsjednik i četiri člana.
- (2) Predsjednik i članovi Komisije se biraju na mandat od pet godina, na način i po postupku utvrđenim ovim Zakonom.
- (3) Predsjednik i članovi Komisije mogu biti izabrani najviše dva puta.
- (4) Predsjednik i članovi Komisije biraju se na osnovu javnog poziva.
- (5) Postupak oglašavanja i utvrđivanja prijedloga kandidata provodi Zajednička komisija za ljudska prava Parlamentarne skupštine Bosne i Hercegovine.
- (6) Odluka o listi uspješnih kandidata donosi se dvotrećinskom većinom glasova.
- (7) Šest mjeseci prije isteka mandata predsjednika, odnosno članova Komisije, pokreće se postupak za izbor novog predsjednika, odnosno članova Komisije.

#### **Član 19.**

##### **(Izbor predsjednika i članova Komisije)**

- (1) Predsjednika i članove Komisije bira Parlamentarna skupština Bosne i Hercegovine na osnovu liste kandidata koju sastavlja Zajednička komisija za ljudska prava Parlamentarne skupštine Bosne i Hercegovine.
- (2) Mandat predsjednika i članova Komisije počinje danom imenovanja.

#### **Član 20.**

##### **(Uslovi za izbor predsjednika i članova Komisije)**

- (1) Kandidat za predsjednika, odnosno člana Komisije, mora ispunjavati sljedeće uslove:
  - a) da je državljanin Bosne i Hercegovine;
  - b) da ima prebivalište na području Bosne i Hercegovine;
  - c) završen pravni fakultet ukoliko se kandiduje za predsjednika, odnosno visoka stručna sprema, ukoliko se kandiduje za člana Komisije;
  - d) da ima najmanje osam godina radnog iskustva u struci ukoliko se kandiduje za predsjednika, odnosno četiri godine ukoliko se kandiduje za člana Komisije;
  - e) da nije osuđivan za krivična djela i da se protiv njega ne vodi krivični postupak;
  - f) da nije član političke stranke i da nije bio član političke stranke pet godina prije kandidature za predsjednika ili člana Komisije;

- g) da 10 godina prije kandidiranja za predsjednika ili člana Komisije nije obavljao funkciju poslanika, delegata, odbornika ili vijećnika, gradonačelnika, načelnika opštine, člana vlade ili savjetnika na bilo kojem nivou vlasti u BiH;
- (2) Nakon izbora za predsjednika, odnosno za člana Komisije, kandidat je dužan da podnese, redovno ažurira i javno objavi Izvještaj o finansijskom stanju i imovini iz člana 14. ovog Zakona.

#### **Član 21.**

##### **(Ovlaštenja predsjednika Komisije)**

- (1) Predsjednik Komisije organizuje i upravlja radom Komisije.
- (2) U slučaju da je spriječen ili odsutan, Predsjednik Komisije bira jednog od članova Komisije za svog zamjenika.
- (3) Predsjednik Komisije zadužiće pojedinog člana Komisije za određeno područje rada iz nadležnosti Komisije.
- (4) Predsjednik saziva i predsjedava sjednicama Komisije, potpisuje akte donesene na sjednicama Komisije, brine o pravilnom i efikasnom provođenju Zakona, te obavlja druge poslove utvrđene Zakonom i poslovníkom Komisije.

#### **Član 22.**

##### **(Prestanak funkcije predsjednika i članova Komisije)**

- (1) Predsjedniku i članovima Komisije funkcija prestaje prije isteka vremena na koji su izabrani u slučaju smrti i u slučajevima razrješenja s dužnosti.
- (2) Predsjednik i član Komisije razrješit će se s dužnosti:
- a) na vlastiti zahtjev;
  - b) u slučaju gubitka poslovne sposobnosti;
  - c) ako prestanu postojati uslovi za izbor iz člana 20. ovog Zakona;
  - d) ako prekrše odredbe ovog Zakona.
- (3) Odluku o razrješenju s dužnosti, predsjedniku i članovima Komisije, donosi Parlamentarna skupština BiH.
- (4) Ako predsjednik i član Komisije, na vlastiti zahtjev, zatraži da bude razriješen dužnosti a Parlamentarna skupština BiH ne donese odluku o zahtjevu u roku od tri mjeseca od dana podnošenja zahtjeva, predsjedniku i članu Komisije funkcija prestaje po sili zakona istekom tri mjeseca od dana podnošenja zahtjeva.
- (5) U slučaju prestanka funkcije predsjedniku Komisije, članovi Komisije između sebe biraju vršioca dužnosti predsjednika, koji tu dužnost obavlja do izbora novog predsjednika.
- (6) U roku od 30 dana od dana prestanka dužnosti predsjedniku i članu Komisije, Zajednička komisija za ljudska prava Parlamentarne skupštine BiH pokrenut će postupak za izbor novog predsjednika, odnosno člana Komisije.

#### **Član 23.**

### **(Ured Komisije)**

- (1) Stručna služba Komisije je Ured Komisije za odlučivanje o sukobu interesa (u daljem tekstu: Ured Komisije) koji obavlja stručne, administrativne i tehničke poslove.
- (2) Komisija, uz saglasnost Vijeća ministara, donosi Pravilnik o unutrašnjoj organizaciji i sistematizaciji radnih mjesta (u daljnjem tekstu: Pravilnik), kojim se uređuje unutrašnja organizacija Ureda Komisije, utvrđuju se radna mjesta i opis poslova, broj državnih službenika i zaposlenika, stručni i drugi uslovi potrebni za raspored na radna mjesta. Na zaposlene u Uredu Komisije primjenjuju se propisi koji se odnose na državne službenike i zaposlenike. Tehničku i administrativnu podršku Uredu Komisije daje Sekretarijat Parlamentarne skupštine BiH.

### **Član 24.**

#### **(Postupak pred Komisijom)**

- (1) Komisija može pokrenuti postupak za utvrđivanje kršenja odredbi Zakona i izreći sankcije:
  - a) po službenoj dužnosti;
  - b) na zahtjev nosioca javne funkcije;
  - c) na zahtjev neposredno pretpostavljenog nosiocu javne funkcije;
  - d) na zahtjev organa u kojem vrši funkciju;
  - e) na osnovu prijave o sukobu interesa.
- (2) Podaci o podnosiocu prijave iz stava (1) tačka e) ovog člana su povjerljivi, osim ako podnosilac prijave izričito zatraži da ti podaci budu dostupni javnosti, odnosno nosiocu funkcije na kojeg se prijava odnosi, kao i organu u kojem vrši funkciju.
- (3) Komisija je dužna obavijestiti podnosioca prijave o svojoj odluci.
- (4) Ukoliko lice sumnja u moguće kršenje Zakona, može tražiti od Komisije da mu u roku od 15 dana izda savjetodavno mišljenje koje se neće objavljivati. Savjetodavno mišljenje uključuje i preporuke za poduzimanje mjera za uklanjanje sukoba interesa, ukoliko on postoji. U slučaju da se utvrdi kršenje Zakona, nosiocu javne funkcije će se odrediti rok da poduzme mjere i otkloni uzroke kršenja Zakona, ukoliko je to moguće. Ukoliko nosilac javne funkcije ne otkloni uzroke kršenja Zakona, ili ukoliko iste nije moguće otkloniti, Komisija će pokrenuti postupak u skladu sa stavom (1) tačka a) ovog člana.
- (5) Komisija je dužna provesti postupak u roku od šest mjeseci, dok je rok za pokretanje postupka u odnosu na počinjenje povrede odredbi ovog Zakona četiri godine.
- (6) Komisija obavještava nosioca javne funkcije o pokretanju postupka iz stava (1) ovog člana.
- (7) Komisija može pozvati nosioca javne funkcije, povezano lice, kao i lice na osnovu čije prijave je pokrenut postupak radi pribavljanja informacija i zatražiti dostavljanje potrebnih podataka, u cilju odlučivanja o postojanju povrede Zakona.

(8) Komisija će, od nosioca javne funkcije protiv koga je pokrenut postupak iz stava (1) ovog člana, zatražiti da dostavi pisano izjašnjenje u roku od 15 dana od dana prijema zahtjeva za dostavljanje pisanog izjašnjenja.

(9) Ako nosilac javne funkcije ne dostavi pisano izjašnjenje, Komisija će nastaviti postupak u skladu sa ovim Zakonom.

(10) Komisija ima pravo utvrditi činjenice vlastitom administrativnom istragom ili pribaviti činjenice i dokaze u saradnji sa drugim organima. Svi javni organi na svim nivoima vlasti u BiH, te sva lica od kojih Komisija to zatraži, obavezni su Komisiji dostaviti tražene informacije.

(11) Ukoliko javni organi, te lica iz stava (10) ovog člana, ne postupe po zahtjevima Komisije iz člana 15. stav (2), te člana 24. stav (7) i (10) Zakona, Komisija obavještava organ koji vrši nadzor nad njihovim radom, te može podnijeti poseban izvještaj Parlamentarnoj skupštini BiH i njenim nadležnim komisijama, odnosno obavijestiti javnost.

(12) Osim kada je Zakonom drugačije propisano, postupak pred Komisijom otvoren je za javnost.

(13) Komisija je dužna konačnu odluku donijeti najkasnije u roku od 15 dana od dana okončanja postupka prikupljanja činjenica i izvođenja dokaza.

(14) U slučaju postojanja sumnje da je učinjeno krivično djelo, Komisija će izvještaj sa dokazima prikupljenim u vršenju svoje dužnosti, bez odlaganja dostaviti nadležnom tužilaštvu.

(15) O sukobu interesa članova Komisije za odlučivanje o sukobu interesa odlučuje Zajednička komisija za ljudska prava Parlamentarne skupštine BiH.

## **Član 25.**

### **(Donošenje odluka)**

(1) Komisija odlučuje na sjednicama, većinom glasova svih članova Komisije.

(2) Pravosnažne i konačne odluke moraju biti obrazložene i objavljuju se na internetskoj stranici Komisije.

## **Član 26.**

### **(Žalba)**

Protiv odluke Komisije može se izjaviti žalba Apelacionom odjeljenju Suda Bosne i Hercegovine u roku od 15 dana od dana prijema odluke.

## **Član 27.**

### **(Sankcije)**

(1) Sankcije koje Komisija može izreći nosiocu javne funkcije za povrede ovog Zakona su:

- a) opomena;
- b) novčana kazna u iznosu od 1.000 do 20.000 KM;
- c) prijedlog za razrješenje s dužnosti;

- d) poziv na podnošenje ostavke.
- (2) Opomena, iz stava (1) tačka a) ovog člana, izriče se za lakše oblike kršenja odredbi ovog Zakona.
- (3) Novčanu kaznu, iz stava (1) tačka b) ovog člana, Komisija izriče za kršenje odredbi čl. 5., 6., 7., 8., 9., 10., 11., 12., 13. i 14. vodeći računa o težini i posljedicama povrede Zakona, te šteti koju je povreda nanijela integritetu funkcije koju nosilac javne funkcije obavlja.
- (4) Prijedlog za razrješenje s dužnosti, iz stava (1) tačka c) ovog člana, izriče se nosiocima javnih funkcija koji nisu izabrani zvaničnici, u situacijama kada je utvrđeno kršenje odredbi čl. 6. i 11. Zakona.
- (5) Prijedlog za razrješenje s dužnosti nosioca javne funkcije Komisija podnosi organu vlasti nadležnom za njegov izbor ili imenovanje. Organ vlasti nadležan za izbor ili imenovanje nosioca javne funkcije dužan je da obavijesti Komisiju o mjerama preduzetim povodom izrečene mjere prijedloga za razrješenje, u roku od 30 dana od dana prijema prijedloga.
- (6) U situacijama kada Komisija utvrdi da je izabrani zvaničnik prekršio zakonske odredbe iz stava (3) ovog člana, Komisija će izabranog zvaničnika pozvati da podnese ostavku na obnašanje javne funkcije. Komisija će poziv na ostavku objaviti u "Službenom glasniku BiH", te na web stranici Komisije.
- (7) Novčana kazna u iznosu od 100 KM do 500 KM izriče se nosiocu javne funkcije za kašnjenje u dostavljanju izvještaja o finansijskom stanju i imovini.
- (8) Dodatna mjera koju Komisija izriče je zahtjev za poništenje djela nastalog u situaciji sukoba interesa, u slučajevima kada utvrdi da je nosilac javne funkcije pribavio korist, sklopio ugovor, donio odluku ili dao saglasnost na odluke koje ga stavljaju u sukob interesa. Zahtjev se dostavlja organu u kojem ili u ime kojeg je nastalo djelo, kojem se ostavlja rok od 60 dana da donese odluku na osnovu zahtjeva Komisije te istu obrazloži.
- (9) Ako je povredom ovog Zakona pravnom ili fizičkom licu pričinjena šteta, to lice ostvaruje pravo na naknadu štete tužbom u parničnom postupku kod nadležnog suda, primjenom opštih pravila o naknadi štete.
- (10) Ukoliko ne dostave tražene podatke i obavještenja, odnosno ne stave na uvid traženu dokumentaciju, organima i pravnim licima iz člana 15. i člana 24. Zakona, Komisija izriče novčanu kaznu u iznosu od 300 do 5.000 KM.
- (11) Odgovorna lica u organima i pravnim licima kazniće se za prekršaj iz stava (10) ovog člana novčanom kaznom u iznosu od 200 do 3.000 KM.

#### **Član 28. (Izvještaj)**

Komisija jednom godišnje podnosi izvještaj o svom radu Parlamentarnoj skupštini BiH.

#### **Član 29. (Prelazne i završne odredbe)**

(1) U roku 30 dana od dana stupanja na snagu ovog Zakona Parlamentarna skupština BiH pokrenuće postupak imenovanja članova Komisije, koji će se okončati u roku od 90 dana od dana stupanja na snagu ovog Zakona.

(2) Komisija za odlučivanje o sukobu interesa preuzima zaposlene iz Agencije za prevenciju korupcije i koordinaciju borbe protiv korupcije koji su do stupanja na snagu ovog Zakona obavljali poslove koji su preneseni u nadležnost Komisije i rasporediti ih u skladu s Pravilnikom na pozicije u Ured Komisije, koje ne mogu biti niže od pozicija na kojima su zatečeni.

(3) Komisija i Agencija za prevenciju korupcije i koordinaciju borbe protiv korupcije, u roku 60 dana od dana stupanja na snagu ovog Zakona, zaključit će sporazum o preuzimanju zaposlenih i materijalno-tehničkih dobara koje je koristilo Odjeljenje za sukob interesa/Ured Komisije, u kojem se detaljno uređuju svi aspekti njihovog preuzimanja.

(4) Do izbora predsjednika i članova Komisije iz stava (1) ovog člana, Komisija u dosadašnjem sastavu obavljat će poslove u skladu sa ovim Zakonom.

(5) Do okončanja postupka iz st. (2) i (3) ovog člana Ured Komisije osnovan Zakonom o sukobu interesa u institucijama vlasti Bosne i Hercegovine ("Službeni glasnik BiH", broj 13/02, 16/02, 14/03, 12/04, 63/08, 18/12, 87/13 i 41/16) nastavlja obavljati poslove iz svog djelokruga rada u skladu sa ovim Zakonom.

(6) U roku od 30 dana od dana stupanja na snagu ovog Zakona, Komisija sačinjava akte iz člana 17. ovog Zakona objavljuje ih na internet stranici Komisije.

(7) Svi podzakonski akti doneseni na osnovu Zakona o sukobu interesa u institucijama vlasti BiH ("Službeni glasnik BiH", br. 13/02, 16/02, 14/03, 12/04, 63/08, 18/12, 87/13 i 41/16) ostaju na snazi do donošenja novih.

(8) Postupci pokrenuti do dana stupanja na snagu ovog Zakona okončaće se po propisima koji su bili na snazi u vrijeme pokretanja postupka, ako je to povoljnije za stranku u postupku.

### **Član 30.**

#### **(Prestanak važenja)**

Danom stupanja na snagu ovog Zakona predstaje da važi Zakon o sukobu interesa u institucijama vlasti BiH ("Službeni glasnik BiH", br. 13/02, 16/02, 14/03, 12/04, 63/08, 18/12, 87/13 i 41/16).

### **Član 31.**

#### **(Stupanje na snagu)**

Ovaj Zakon stupa na snagu osmog dana od dana objave u "Službenom glasniku BiH".

## O B R A Z L O Ž E N J E

### I. Ustavni osnov za usvajanje zakona

Ustavni osnov za usvajanje ovog Zakona sadržan je u članu IV.4 a. Ustava BiH, po kojem je Parlamentarna skupština BiH nadležna za donošenje zakona koji su potrebni za provođenje odluka Predsjedništva BiH ili za vršenje funkcija Skupštine po Ustavu.

### II. Razlozi za donošenje zakona

Postojeći Zakon o sukobu interesa u institucijama vlasti Bosne i Hercegovine (Službeni glasnik BiH, br. 16/02, 14/03, 12/04, 63/08, 18/12, 87/13, 41/16) neophodno je mijenjati kako bi se osigurala efikasna i nezavisna primjena instituta sukoba interesa, te ujednačili i uskladili propisi koji regulišu sukob interesa i izvještaje o imovinskom finansijskom stanju nosilaca javnih funkcija.

Obaveza izmjena ovog Zakona proizilazi iz Strategije za borbu protiv korupcije (2015-2019) i Akcionog plana, a koja je predviđena u Strateškom programu 1.12 (*Uskladjivanje zakonodavnog okvira u BiH sa obavezama iz ratificiranih međunarodnih konvencija*).

Evidentna je potreba usaglašavanja Zakona sa prihvaćenim međunarodnim standardima i preporukama, kao i ratifikovanim međunarodno-pravnim instrumentima koji regulišu oblast sukoba interesa imajući u vidu obaveze BiH na evropskom putu u oblasti vladavine prava i borbe protiv korupcije. Ovo je naglašeno i u četvrtom evaluacijskom izvještaju Grupe zemalja Vijeća Evrope protiv korupcije, te u izvještaju Evropske komisije za BiH za 2016. godinu u kojem je konstatovano da su normativni i institucionalni okvir za sukob interesa neadekvatni i da su izmjene zakona neophodne. To se prvenstveno odnosi na sastav, pravni status i nadležnosti tijela za sprovođenje zakona o sukobu interesa, a koji u važećem Zakonu o sukobu interesa nisu usaglašeni sa gore pomenutim standardima što za posljedicu ima nedjelotvornost sistema sprječavanja i sankcionisanja sukoba interesa. Takođe, noveliranje pravnog okvira o sukobu interesa u institucijama vlasti BiH navedeno je i kao jedan od prioriteta u Akcionom planu Reformske agende.

S tim u vezi, Prijedlog Zakona o sukobu interesa u institucijama Bosne i Hercegovine, podrazumjeva sljedeće izmjene u odnosu na postojeći Zakon:

- Uspostavljanje nezavisnog, profesionalnog tijela za provođenje Zakona, odnosno Komisije za odlučivanje o sukobu interesa, kao stalno, nezavisno i samostalno tijelo uspostavljeno od Parlamentarne skupštine BiH, čije članove bira Parlamentarna skupština BiH, ali koji se biraju na osnovu javnog poziva;



- Detaljnije definisanje i proširenje kruga lica na koja se Zakon primjenjuje, s ciljem ujednačenog tretmana prema svim nosiocima javnih funkcija;
- Uvođenje jasnih i jedinstvenih pravila koja ograničavanju vršenje više funkcija, te jasnih pravila u obavljanju funkcija, angažmana i poslovanja nosilaca javnih funkcija i nakon prestanka funkcije, kako bi se osigurala nepristrasnost u donošenju odluka;
- Objedinjavanje i usklađivanje propisa o izvještajima o imovini i sukoba interesa, jasno definisanje nadležnosti u pogledu prikupljanja, objavljivanja i kontrole od strane Komisije koja provodi zakon;
- Uvođenje dostupnosti i obaveze podnošenja imovinskih kartona na godišnjoj osnovi, kao i uspostavljanje sistema provjere tačnosti podataka u izvještajima i objavljivanje registra nosilaca funkcija i njihove imovine;
- Proširenje spektra i vrsta sankcija i uvođenje novih mehanizama, kao što su poništenje djela nastalog u situaciji sukoba interesa.

### **III. Principi na kojima je prijedlog zakona zasnovan**

Prilikom izrade ovog akta, predlagač se vodio sljedećim principima:

- Princip nediskriminacije, gdje se predloženim odredbama osiguravaju jednaka prava i obaveze svim nosiocima javnih funkcija na koje se Zakon odnosi, te nepristrasan i objektivan pristup provođenju Zakona;
- Princip pravne sigurnosti, kao posebno važan segment za osiguranje vladavine prava, imajući u vidu da su u procesu provođenja postojećeg Zakona o sukobu interesa u institucijama vlasti BiH identifikovane prepreke za njegovo efikasno provođenje, uzrokovane neadekvatnim pravnim i administrativnim statusom Komisije za odlučivanje o sukobu interesa. S tim u vezi Prijedlog Zakona o sukobu interesa u institucijama BiH usmjeren je na jasno definisanje statusa tijela za primjenu Zakona, te osiguranje njegove nezavisnosti i efikasnosti. Ovaj princip korišten je i kroz osiguranje kontinuiteta i nesmetane primjene zakona i u periodu uspostavljanja nove Komisije i usvajanja podzakonskih akata.

### **IV. Usklađenost sa evropskim zakonodavstvom i međunarodnim dokumentima**

Predlagač se pri izradi Prijedloga rukovodio OECD Smjernicama za rješavanje sukoba interesa u javnoj upravi, preporukama Grupe zemalja za borbu protiv korupcije Vijeća Evrope (GRECO) navedenim u Četvrtom evaluacijskom izvještaju za Bosnu i Hercegovinu, te nalazima i preporukama Evropske komisije iz Izvještaja za Bosnu i Hercegovinu iz 2016 god.

### **V. Finansijska sredstva za provedbu zakona**

Za provedbu Zakona neophodno je osigurati finansijska sredstva potrebna za rad članova Komisije za odlučivanje o sukobu interesa. Kako bi se ostvarila racionalizacija potrebnih sredstava, predviđeno je izmještanje osoblja sadašnjeg Odjeljena za sukob interesa iz Agencije za prevenciju korupcije i koordinaciju borbe protiv korupcije, i preuzimanje od

strane Komisije za odlučivanje o sukobu interesa, zajedno sa svim pripadajućim materijalnim i tehničkim resursima. Sa istim ciljem, predviđeno je da sjedište Komisije bude u Parlamentarnoj skupštini BiH, te korištenje postojećih resursa Parlamentarne skupštine BiH, u smislu administrativne i tehničke podrške radu Komisije, a da se sredstva za njen rad osiguravaju iz Budžeta PSBiH.